

中國近代文學叢書

上海古籍出版社

琴志樓詩集

三

易順鼎 著
王 飈 校點

中國近代文學叢書

上海古籍出版社

琴志樓詩集

三

易順鼎 著
王 飈 校點

琴志樓詩集卷十二

魂西集

起庚子閏八月

閏八月二十六日由金陵赴行在

幕府淹留未幾時，麻鞋又逐羽書馳。清秋風物宜行役，多難乾坤更別離。日返舍三夸父策，月逢閏八少陵詩。遠游爲了人間事，莫道靈均是好奇。

潯陽親舍初發感懷四首

西風瑟瑟動庭梧，獨辦嚴裝赴帝都。北海知劉豫州否，南朝有李侍郎無。處堂那作安巢燕，繞樹惟同反哺烏。惆悵題書別鄉里，杜陵弟妹與妻孥。

誰教豺虎遍京畿，頓使蛟龍入禁扉。千里青謠徒有卓，滿江紅曲竟無飛。累朝王氣銷朱邸，一夕妖星犯紫微。我似文山遭陽九，黃冠忍向故園歸。

翠華西幸尚蒙塵，避狄居邠本至仁。敢負卧薪嘗膽意，誰非踐土食毛身。平生忠義思張楚，近日文章恨美新。重覩威儀漢司隸，妖腰亂領又何人。

蘿帶荷衣佩蕙蘭，遠游還著切雲冠。一雙不借隨腰脚，十萬橫磨照膽肝。彩筆肯遭鸚鵡辱，珍裘微惜鷓鴣寒。太行雲與神州氣，明日關河立馬看。

感事

痛哭天心猶未悔，傳聞虜騎已長驅。瘡痍直北驚烽燧，膏血江東困轉輸。強敵方求侂冑首，庸奴自取屈釐誅。收京郭李知誰是，西望雲山一嘆吁。

重九前一日漢上酒樓獨飲

細雨溟濛江漢寬，楚天無際倚闌干。水爲萬古無情綠，酒是千齡不老丹。故國魚兼蓴菜美，新霜人共菊花寒。樓船樓閣俱雄壯，黃鶴黃龍醉裏看。

寒 雨

寒雨已成霰，行人方在塗。北書憂社稷，南菊感江湖。身世危檣在，乾坤短褐孤。猶思酬造化，忼慨伏青蒲。

中 夜

飛雨挾寒浪，奔騰萬馬聲。燈明漢陽郭，雲黑武昌城。天地腥羶滿，關山涕泗橫。腐儒憂國意，中夜獨屏營。

江上寄程六

不風不雨亦淒涼，無酒無花更斷腸。如此乾坤如此客，頭陀寺畔作重陽。

酒樓又飲時乘輪舟赴沙市

昔日題襟地，今朝落帽風。水明鴨頭綠，花醉雁來紅。樓閣如天上，江山是鏡中。長

安四千里，楚客一孤篷。

改太白二絕句

楚客東辭黃鶴樓，風霜九月入皇州。
長江遠影碧空盡，惟見黃河天上流。
長安爲客別長沙，南望長沙不見家。
黃鶴樓中攜笛去，數聲吹落渭城花。

城陵磯作

暝辭漢陽渡，曉泊巴陵磯。
江挾白龍走，我乘黃鶴飛。
荆湖諸水合，楚蜀數帆歸。
欲寄長沙信，衡陽雁去稀。

江陵舟中和杜詠懷古跡韻五首

月出三更三點後，李義山詩：「三更三點萬家眠。」舟行九十九洲間。
孤篷寂寞惟聽水，兩岸蒼茫不見山。
楚客西行何日到，蜀江東下幾時還。
惟應滿目飛明鏡，直送愁心入武關。
聞道遺民爲楚悲，當年此地亦京師。
左州右蔡登臺日，北夢南雲縱獵時。
哀郢龍蛇呵

壁恨，亡秦驢馬渡江思。竹枝調苦無人和，冷雁哀猿似九疑。

劍門天險接夔門，夢斷樓桑故國村。赤壁焚舟江月皎，白衣搖櫓陣雲昏。真龍不愧高皇種，杜宇難招望帝魂。今日襄陽耆舊少，中原王業與誰論。

十二鬟低神女峽，三千腰細楚妃宮。狂風古月荒臺上，暮雨朝雲破廟中。茅屋昭王陪野老，空山蜀主伴村翁。惟應騷客臨江宅，留與蘭成子美同。

虎渡維舟西浪大，龍山吹帽朔風高。羅含宅畔吟湖目，蘇詩湖目儘堪供眼，木奴大可爲生。宋玉祠前薦渚毛。擾擾魚蝦憐割據，紛紛豚犬笑兒曹。六朝五季皆塵土，南北兵爭何太勞。

由沙市至荊州城外作

江湖載酒十年游，銷盡雄心不自由。髀肉久生腰脚老，却來立馬望荊州。行人斷續兩東門，都似飛鴉點點痕。馬背船唇載何物，斜陽顏色是秋魂。

荊州北發

中原形勝此神皋，根觸雄心看寶刀。一上將軍諸葛表，兩東門路屈原騷。半空日與鴉

同色，九月風如虎怒號。二十六年渾似夢，人民城郭首重搔。

宿樂鄉關用陳伯玉晚次詩韻

昔賢行役地，而我復遐征。古今同逆旅，天地一愁城。詩格唐風盛，關山楚望平。無爲感飄泊，異代接嚶鳴。

樂鄉關樓晚眺

天末戍樓在，登臨暮色間。楚雲連海嶠，秦月滿關山。冷落存三戶，飄飄犯百蠻。時危兼遠別，回首鬢毛斑。

荆門道中

故國渺何處，行人方獨愁。西風吹漢水，殘日下昭丘。雲碧江帆夕，霜紅驛樹秋。天涯無限感，莫上仲宣樓。

襄陽曲

落日峴山北，秋風漢水西。至今諸士女，猶唱白銅鞮。客路迷平楚，人家近大堤。不知芳樹上，何處有烏棲。

襄陽與劉吳二君游覽諸名勝

峴首霜初冷，習池波欲荒。登臨餘我輩，人物此襄陽。秋水鴨頭綠，夕暉鴉背黃。鹿門山近遠，相對晚蒼蒼。

襄陽題壁

山南東道有唐樓，此是中原第一州。上將兵威漢華夏，名家史筆晉陽秋。詩人絕憶槎頭釣，佳客誰陪峴首游。欲訪龐公無處所，却疑上塚未回舟。

魯陽關謠

魯陽關，路崎嶇。石犂確，水沮洳。我僕既痛，我馬亦瘡。行人絡繹，爭出此塗。行人何爲絡繹出此塗？秦東南，豫西北，赤地千里禾焦枯。飢無食，寒無繻，不死故鄉願死路。隅媼驅驢，婦牽驢；翁推車，兒挽車。勿歌李白蜀道難，請上鄭俠流民圖。

魯陽水歌

魯陽水，何清泚。流出萬重山，經行幾百里。昔者魯陽公，與韓戰於此。揮戈返白日，白日爲之止。吾聞古夸父，逐日實暍死。遺杖化爲竹，即今鄧林是。誠能金石開，志與天地擬。安得此兩人，持以獻天子。

伊闕

落日不可畫，河流雙闕間。漁舟渡伊水，僧磬冷香山。蘚佛萬千碧，楓人三兩殷。龍門能買否，吾欲弄潺湲。

洛陽書感

翟泉幾度出蒼鵝，千古興亡一剎那。王氣劇憐中土盡，人才還惜北邙多。橋邊杜宇誰先聽，陌上銅駝祇獨摩。我是新亭過江客，又來收涕對黃河。

北邙

鬱鬱北邙山，中多貴人墓。王侯與將相，了不知其數。已無金盃出，惟有石人仆。牽狗過獵徒，驅羊來牧豎。死後一邱貉，生前三窟兔。富貴如飄風，人生若朝露。何爲勞心神，乾沒競奔赴。古今同一轍，賢愚皆不悟。山色獨長存，千載青如故。

新安縣

山路真如甕，人行仰見城。居民半陶穴，戰地有秦坑。樹帶函關色，河流澗水聲。時危思設險，憑軾不勝情。

新安坑

驪山儒，長平兵，一君一臣俱善坑。甫長平，又新安，前嬴後項何凶殘。秦君臣可誅，秦降卒何辜。二十萬骨同時枯，此語我疑前史誣。天生億萬人，使一二人殺，不然闖獻無此辣，我欲問天天不答。

函關行

秦中天險稱函谷，秦人曾逐中原鹿。關山雄據一百二，郡國坐收三十六。開關延敵敵逡巡，應惜當年誤翦鶻。馬歸牛放須臾夢，虎視龍興幾度春。從來地利須人事，廢興莫喻皇天意。運去丸泥覆隗囂，時來寸土資劉季。不乘駟馬與高軒，幾輩男兒愧郭丹。楊僕東移三百里，李叟西去五千言。青山對客渾無語，落月鷄聲何處所。華嶽遙瞻武帝雲，殽巖近避文王雨。長安渭水作京華，弔古休興異代嗟。八關自昔雄三輔，四海如今是一家。

【評】

樊山云：抗手高岑。

上硤石山即古嶠坂

西行上嶠坂，嶠坂峻且長。七盤下絕谷，九折登崇岡。我僕力既痛，我馬亦元黃。前車入鼠穴，後乘排天閭。升降未及半，白日忽已藏。窮山戴危石，萬古無春陽。連峯障其西，不見井與疆。王子陟印嶽，管生踰太行。古來功名人，翩若龍鸞翔。繫余獨何爲，涉險心慨慷。

暝行黃河岸宿稠桑驛

天暝北風勁，雁聲初渡黃。南飛幾千里，爲我過瀟湘。霜雪年華暮，關河道路長。誰知異鄉客，今夜宿稠桑。

潼關道中二首

天府神皋據上游，此中依舊是皇州。翠華西幸周王駿，紫氣東來李叟牛。關百二重秦代月，宮三十六漢時秋。河聲嶽色渾無奈，不爲愁人一解愁。

眼底葱河作酒杯，巨靈高掌映崔嵬。雲從武帝祠邊散，雨自文王陵下來。城堞雉連秦晉樹，關門牡繡漢唐苔。青山對客渾無語，懷抱何由得好開。

【評】

樊山云：二詩精麗無匹。

望嶽

蓮峯千丈擁巒岼，今日真來立馬看。拄地儼同金母杖，平天宜作玉皇冠。九州風雨朝行闕，萬古雲霞染醺壇。呼吸定知容易達，於今帝座是長安。

登萬壽閣和樊樊山韻

咫尺瓊霄聲欸通，仙人手把碧芙蓉。瑤池雪作簾前水，玉井花爲檻外峯。三輔黃圖天下壯，九州黛色此間濃。明朝更訪希夷去，一睡千年學五龍。

華山道中漫感

側帽微吟有所思，荒墳何處訪蘭芝。行人立馬羅敷水，仙客乘鸞玉女祠。天地魂銷還有我，漢唐才盡久無詩。欲將異代蕭條淚，說與雲門老宿知。

渭南道中懷樊山作

我行渭南道，始見黃葉村。道旁萬餘株，垂柳無一髡。惜無相與楓，點綴朱殷痕。此邦多竹樹，山水清且敦。關中經喪亂，陸海亦僅存。豈無掛冠人，買牛教子孫。我友昔作宰，海內知雲門。今爲茂陵客，庶可同清尊。崤函一千里，回首風塵昏。對此懷故園，使我勞夢魂。

偶集唐人句

腰垂錦帶佩吳鉤，盡日凝眸嶽色秋。詞客有靈應識我，好雲無處不遮樓。河山北枕秦關險，故國東來渭水流。風景蒼蒼多少恨，秦中自古帝王州。

【評】

樊山云：巧匠運斤。

小雪發渭南縣

漸近長安是軟塵，宮車過處柳猶新。渭城小雪如朝雨，秦地殘雲似美人。一百二重愁望遠，五三六點欲催春。郵亭下馬無相識，獨酌新豐酒數巡。

游驪山浴溫泉作

九龍呵護玉蓮房，來試銷魂第一湯。何忍呼他爲禍水，尚思老我此柔鄉。雪寒繡嶺無松柏，春暖華清有海棠。至竟人生不孤負，風流行樂李三郎。

【評】

樊山云：綺麗。

青門

青門已近思依依，獨蹕吟鞭向夕暉。
灞柳暗黃將作縷，嶽蓮濃翠尚霑衣。
雲開紫閣看山去，雪滿藍田射獵歸。
歲暮鄉關何處所，天涯寥落寸心違。

灞橋

已覺川原氣鬱葱，客來折柳莫匆匆。
流殘清霸無情水，畫出阿房不露虹。
風雪詩催驢背上，關河人老雁聲中。
長安日近翻惆悵，走馬天涯是轉蓬。

【評】

樊山云：次聯名句。

自襄樊至西安道中絕句二十六首

襄漢平連宛洛津，十年重踏豫州塵。
誰知此日芒鞋客，亦是當年繡斧人。
郢鄢冠蓋照山川，憑弔空餘蔓草煙。
地氣盡隨人事改，興亡從古不關天。